

Panis Evangelici Fragmenta Qvadragesimalia Tripartita


Ex sanctissimo Dei Verbo copiosé & sedulo collecta, Sanctorum Patrum,
variorumque Auctorum sententiis & conceptibus mirificè aucta; Et
Omnibus Quidem Anni Dominicis; præcipuè tamen singulis Quadragesimæ
Dominicis & Feriis per binas ad minus, sæpius denas aut septenas
Conciones fideli Populo ...

**Lingendes, Claude de
Coloniae Agrippinae, 1689**

XXIII. Quæ est septima de dilectione inimicorum, probat melius famæ
consuli ignoscendo quàm se vindicando.

Nutzungsbedingungen

[urn:nbn:de:hbz:466:1-56333](#)



FERIA SEXTA CINERUM

CONCIO SEPTIMA

DE DILECTIONE INIMICORUM.

Quòd meliùs famæ consulatur ignoscendo , quām
se vindicando.

Diligite inimicos vestros. Matth.5.

CUM multa haec tenus circa injuriarum ultiōnem , contra communem legem mundi ostenderimus: 1. quidem, facilius esse parcere, quām ulcisci. 2. plus peccare qui refert , quām qui infert, injuriam. 3. quòd ea sit omnium optimæ ratio lēse ulciscendi. 4. quòd injuriarum condonatiō non sit actus ignaviae , sed fortitudinis : ultimum mihi hodie superest ostendendum , injuriarum condonatione , plus famæ & honori satisfieri , quām vindictâ & ultiōne : quidquid innumeris mortalibus contrarium videatur , qui passim existimant indecorum esse , & gradu nobilitatis indignum , vel injuriam acceptam condonare , nisi is qui fecit , planè satisfecerit ; vel injuriæ irrogatæ vindictam , per publicam potestatem quærere : sed tūm demūm qui offensus est , integrum suum honorem servare , si sibi ipsi factus judex , privatâ authoritate le ulciscatur: quā mala persuasio , quia altissimas in hominū animis radices egit , ut illi nos opponamus , non nostris tantum viribus , sed cœlestibus etiam depugnandum est : & ut illas habeamus , opem à Deo accersamus , Beatæ Virginis precibus , & intercessione.

Ave Maria.

AD arcem difficultatis pervenimus circa id quod attinet ad injuriarum aut condonationem , aut vindicationem , cūm jam res illa spectet id quod in rebus humanis putatur esse maximum , honorem scilicet , secundūm illud Sapientis Proverb. 22. *Melius est nomen bonum , quām divitiæ multæ :* cuius qui sunt capacissimi , & qui in vitâ illum propriè spectant , summum fere in eo collocant , ut injuria impunè non

Mm 2 infe-

Inferatur, præsertim si habeat aliquid dedecoris, ut est contumelia; idque ex communi hominum etiam sapientum existimatione, & ex eorum iudicio, qui veri honoris, & veri dedecoris sunt arbitri; unde apud multos duellorum justificatio, atque defensio: idque fuit quod potissimum ab adversario nobis objectum est: adversum quos omnes hoc unum contendo, cum qui parcit, plus famæ & honori suo satisfacere, quam qui ulciscitur.

Probatur 1. quia absolutèloquendo nullus honor est in se vindicando, & nullū dedecus in parcendo. Prima pars probatur; quia cum honor sit bona de altero existimatio, certum est nullam esse bonam de altero existimationem quod se vindicet. Ratio est; quia nulla potest esse bona existimatio, si non sit de re bonâ, & honesta, qualis non est vindicta: etenim illa actio non potest esse bona, & honesta quæ injusta est. Vide autem multiplicem vindictæ in justitiam. 1. Quod sit contra leges divinas, & humanas: nihil enim frequenter est in Scripturâ, quam prohibitio vindictæ: Matth. 5. *Ego autem dico vobis, diligite inimicos vestros, benefacite his qui oderunt vos, & orate pro persequentibus & calumniantibus vos.* Roman. 12. *Mibi vindicta, & ego retribuam, dicit Dominus.* Item: *non vosmetipso defendentes, charissimi, sed date locum iræ.* Item: *Si esurierit inimicus tuus, ciba illum: si sisit, potum da illi.* Item: *Noli vinci à malo, sed vince in bono malum.* Levitici. 19. *Non queras ultionem, nec memor eris injurie civium tuorum: & alibi passim præcipitur patientia injuriæ, & prohibetur vindicta: leges autem humanæ id passim prohibent, & puniunt; unde*

adversus duella, tot Edicta Regum, & severæ iudicium, & Tribunalium punitiones: & certè meritò, alioqui omnia complerentur, si unicuique liceret per seipsum ius suum repetere: nec sufficit dicere: multa prohiberi legibus propter abusum multorum, qualis est vindicta per seipsum, quæ alioqui speculative licita est, licet practicè in aliquibus sit illicita propter abusum, quo sublatu, omnino licita est etiam practice: nam veritas de æquitate alicuius actionis est practica: itaque illa actio ex natura rei, potest ad præxim licet redigi; etiam ex eius praxi, multa & graviora per accidens sequantur incomoda. Non inquam hoc sufficit dicere; quia eiusmodi incomoda per accidens tantum consequentia ex frequenti exercitio, alicuius actionis, quæ alioqui ex naturâ rei videtur licita, sunt causa instissima, ob quam Respublica eiusmodi actiones gravissime prohibere possit? Quæ autem leges eiusmodi actiones periculosas prohibent, in universum obligant, etiam quando periculum abesse indicatur: alioqui periculum quod efficaciter vitare conantur, non evitarent; unoquoque sibi indulgenter persuasionem absentiae periculi; cum tamen pauci sint, qui pericula omnia prævidere semper, & præcavere queant; quâ de causâ legum adminiculô opus est, quæ comunes scientiæ & prudentiæ defectus suppleant. Ex autem extare, & obligare censendæ sunt, ubicunque puniri solent ex actiones periculosa: cum itaque in omni benè ordinata Republicâ, eiusmodi actiones puniantur, ex saltem iure positivo prohibe-

prohibitæ esse censendæ sunt , ita ut nullo casu ad praxim redigi possunt: & proinde cùm illud quod contra leges sit, sit illicitum ; sequitur ultiōem per seipsum esse illicitam , & consequenter non esse bonam , & ita non pertinere ad bonā æstimationem , & consequenter neque ad honorem cum , ut diximus, honor sit bona de alio æstimatio , & ut bona sit, debeat esse de re bonā , & honesta .

2. In eo est injustitia , quod qui se vindicat , usurpat authoritatem publicam , quæ ad Magistratum pertinet ; nā si non licet alienas forees infringere , ut tua repetas quæ ablata fuerunt , eodem modo non licet illatam tibi injuriam privatā vindictā ulcisci , alioqui multa injustè fierent , & omnia cædibus complerentur. Neque in contrarium facit , dictum illud commune , Vim vi repellere licet ; itaque licet etiam injuriam injuriā repellere ; undi licet se ulcisci .

Nota enim 1. quando dicitur , Vim vi repellere licet , non ita esse accipiendum , ut licitum sit ei qui nos læsit , aut nobis intulit injuriam parē vim inferre post acceptā injuriā ; hoc enim esset exercere actum justitiae vindicativæ , qui nō est privatæ , sed publicæ potestatis : sed sic accipiendum est , ut ante acceptam injuriam , licitum sit exercere actionem aliquam alteri violentam , quā impediatur ne nobis faciat injuriam : unde jus illud vim vi repellendi non respicit injuriam factam , sed faciendam , ut impediatur ne fiat .

Nota 2. ius illud impediendi injuriā faciendam , non respicere quamcumque actionem injuriæ impeditivam , sed

impeditivam illius per modum defensionis : neque enim quæritur , ut alium lædas , sed ut te tuearis ; quod si aliter facere non potes , nisi alium lædas , lædere potes , id usurpando , ut mediū tuæ defensionis .

Nota 3. ius se defendendi tempore præsenti supponere aggressionem completam , vel certè inchoatam tempore præsenti .

Probatur ; quia defensio supponit aggressionem , igitur ius se defendendi tempore præsenti , supponit aggressionem tempore præsenti , si non completam , saltem inchoatam ; unde ius vim vi repellendi dicit duplē ordinem , scilicet ad aliquod factum , & ad aliquod faciendum , ita ut illud ius fundetur in aliquo iam facto , & ad aliiquid post faciendum ordenetur , per oppositionem scilicet impedimenti quo prohibeatur , ne id quod alioqui fieret , executioni mandetur . Hinc sequitur quod non licet eum qui percussit , & fugit , occidere : quia cum injuria iam facta sit , non est injuriæ repulsio ; sed illatio , seu vindicta , quæ semper prohibita est . Item non licet male trahere eum , qui de nobis detraxit in re alicuius momenti ; quia cum injuria jam facta sit , non est amplius justa sui defensio , sed ultio : & in universum non licet factam injuriam ulcisci . Manet itaque probatum quod dixi nullum esse honorem in se vindicando , cùm verus honor sit bona de alio existimatio bona autem illa existimatio sit de re bonā , & laudabili seu honestā , quæ & prohibita est , & illicita .

Secunda pars, nempe, nullum esse dedecus in parcendo, Probatur 1. ex communi hominum sensu, qui illud existimat esse supra humanam conditionem: etenim quilibet se potest ulcisci, cum ad id sufficiat solius naturae impetus, uti patet in feris, & in pueris; itaque ad id non est opus, aut adhortatione, aut institutione, aut præmij pollitione; sed sola natura sufficit, sine additione virtutis, at parcere paucorum est, & ad id opus est tota virtute, unde in ore omnium solet esse commune, id pati non possum, id ferre nequeo, hoc superat vires meas, illud est supra humanam virtutem: itaque se vindicare, infirmitatis est; sed parcere, potestatis & virtutis, eiusque non communis; adeo ut ignavus quisque se ulciscatur, aut si de facto non potest, ulcisci se desideret, cum parcere sit animi exaggerati, & supra mortales eventi, qui nec iræ cedat, nec injuriæ. De Deo sic pronunciat Ecclesia, quod parcendo ostendat omnipotentiam suam: & Sapiens Sapientiae 11. *Misereris omnium, quia omnia potes*: cur non de homine id dici potest? cui præsertim magna de se ipso victoria referenda, magna de irâ & de sensu naturali, quem in animalibus, in pueris, & in amentibus videsmus: igitur nullum est in parcendo dedecus.

2. Probatur; quia uti in alia concione ostendimus, ignorare injuriam non modo non est ignavia, sed etiam actus est summa fortitudinis, quæ potius in patiendo consistit, quam in agendo, uti ostendimus ex doctrinâ Philosophi.

At primò multi contrarium opinantur, qui injuriarum tolerantiam vocant ignaviam, & ultionem interpretantur fortitudinem: id ego novi, sed miror te hominum opinione commoveri, quam omnis sapiens contemnet: scio commūe id esse malum inter homines, ut se hominum opinione commoveri finant; unde Antoninus Imperator lib.4.num. 9. Omnia opinione constant: verum ita remedium subiicit, hoc autem est in tuâ potestate. Tolle igitur cùm lubet opinionem, eruntque tibi, tanquam promontorium prætervecto, omnia serena, & sinus fluctibus vacans. Eodem pertinet quod ait Seneca epi. 13. Plura sunt quæ nos terrēt, quæ quæ nos præmat, & sepius opinione, quæ re laboramus: cito accedimus opinioni: nō coarguimus illa quæ nos in metu adducunt, nec excutimus, sed trepidamus, & vertimus terga; quemadmodum illi quos pulvis, motus fugâ pecorum, exuit castris, aut quos aliqua fabula, sine auctore sparsa conterruit. Nescio quomodo magis vana conturbant; vera enim modum suum habent, quidquid ex in certo venit, conjecturæ & licentiae paventis animi traditur. Id certè nostrâ materiâ contingit, nam in hoc vana est opinio, nullo nixa fundamento: itaque contemnenda est ut falsa omnino morum regula.

Secundò, movit te opinor vox opinionis, ut eam reciperes, sed ne noceat verbi invidia, rem premo strictius, & aliquid gravius oppono: multi, inquis, contra nos iudicant, & ignavum putant qui patitur injuriam, forte qui

qui ulciscitur: itaque primum inglorium esse, & infamia laborare: alium esse in honore: & hoc etiam novi. Sed primo, quinam illi sunt qui ita judicant, certe aut vulgus ignarum, aut homines judicij corrupti, quales plerique in auxiliis reperiuntur, aut inter milites. Disce ex Gregorio Nazian. orat. 27. quanti facere debebas eiusmodi judicia, non dissimilia illis qui vertigine correpti sunt, quibus omnia moveri videntur, & susque deque agitari: an non quibusdam hominibus mel amarum est, nempe morbo laborantibus, maleque affectis; an propterea ita se res habent? fac prius fidem, sanos esse qui ita sentiunt, ac tum demum illis assentiemur; sed vide quām passim male judicent, ut non admodum eorum judicio stemus. Non igitur hoc nobis opponas, plerisque ita videtur; quid enim mea interest, ait Nazian. loco cit. qui rei veritatem solum euro? hoc enim vel me condemnaverit, vel absolverit; hoc miserum, vel beatum reddiderit: sed quid alijs videatur, nihil ad nos quemadmodum alienum somnium. Secundo: fint aliqui qui sic judicant, sed illorum perverso judicio, ipsius Dei judicium, & sapientium judicium oppono. Jam vide cuius judicium cordatis hominibus pluris faciliendum, magisque curandum sit, etiam si omnes homines in unum coacti essent. Audi quemadmodum ratiocinetur Nazian. orat. 27. citatā: Si tu duos homines, quorum alter esset acutior & sagacior: alter autem imperitior & hebetior esset, de eodem negotio in consiliū adhibeas, haud rectā mente præditus videris, si relicto prudentis con-

filio, judicium imperiti sequereris: neque enim Roboam laudem ex eo consecutus es, quod pro nihilo habitā Seniorum sententiā, Iuvenum consiliis paruit: quanto magis id observandum, si Deus, & homines inter se expenduntur, ne judicia hominum potiora ducas quam Dei? Certe judicium Dei tibi pluris esse debet, quam omnium simul hominum. Ne igitur valde commovearis paucorum judicio, qui certe non sapiunt; neque enim sapere dicendi sunt, qui aliter sentiunt, quam Sapientia divina, & qui ab ea coarguuntur. Audi quid in causa longè inferiori scripsit Seneca in fragmentis de remedio fortitorum: Malè loquuntur de te homines, sed mali: moveret si de me Cato, si Lælius Sapiens, si alter Cato, si duo Scipiones ista loquerentur. Nunc malis displicere, laudari es: non potest ullam autoritatem habere sententia, ubi qui damnandus est, damnat. Male de te loquuntur; moveret si iudicio hoc facerent; nunc morbo faciunt: non de me loquuntur, sed de se. Male de te loquuntur; bene nesciunt loqui: faciunt quod non mereor, sed quod solent: quibusdā enim canibus sic innatum est, ut non pro feritate, sed pro consuetudine latrent. Quanto magis id tibi dicendum est, cum accedit Dei suffragium, quo perversa hominum ingenia corrigenda sunt?

Tertiō: Verū quidquid sit, aīs, bene vel male opinorū homines, immo, bene vel male sentiant ac judicent, certe is est communis hominum sensus, & illud est quod inter homines vocamus, aut honorem, aut dedecus.

Ita

Ita ne vero de rebus omnibus judicas,
& hoc putas esse veritatem? Vide quātas absurditates contineat hæc regula.
1. Ut quæ falsa sunt, ea pro veris habeantur quantumlibet falsa sint, quasi opinio res ipsas emendet. Igitur falsa numina, veri Dij facti sunt, quia à pluribus credita sunt; igitur quia apud Ægyptios, Crocodili, Feles, Cœpe, & alia pro Diis culta sunt, vera facta sunt numina, & error, quia communis fuit, desistit esse error, & in scientiam, & certitudinem est commutatus. Quid necesse fuit ut lex Evangelica, & Apostolorum prædicatio, nos à tam multis erroribus vindicaret, si eiusmodi errores in veritates transierunt? Quid necesse fuit Apostolos in veritatis confirmationem suum sanguinem fundere, & tot terras sanguine suo tepefacere, cùm non jam errores, sed ipsas veritates impugnarent? Igitur nationes idololatræ non jā impiæ erant, & divinitatis impugnatrices, sed ipsi Apostoli impij fuerunt, qui credita ab omnib⁹ numina impugnarunt? Igitur & ipse Christus sceleratus fuit & impostor, quia sic à Judæis creditus est: & merito ad mortem damnatus est, quia à pluribus damnatus, & habitus pro reo: nam ut ait Lucas cap. 18. *Exclamavit simul universa turba, dicent.*
Tolle hunc, & dimitte nobis Barabam, qui erat propter seditionem quandam factam in civitate, & homicidium missus in carcерem: 2. Ut injusta habeantur pro justis, & ita apud quosdam populos, licuit filijs senes parentes interimere, & eorum carnibus vesci, quod existimarent honorabilius esse sic finere, quam à vermis bus comedi in sepulchris, & naturali

fine decedere. Eodem modo licuit parentibus filios recenter natos volucribus & feris exponere, aut si debiles essent, aut mutilati, aut si tanto numero essent liberi, ut commodè nutritri non possent: Ita licuit apud Persas matribus concubere: Athenis cum sororibus inire matrimonia, quoniam sic fieri posse existimabant, & alia sexcenta eiusmodi, quæ non modo, minora mala non sunt, aut etiam bona, quia communia sunt, ut etiam majora sunt mala, quia communissima sunt: hæc est enim natura bonorum, & malorum, ut eò majora sunt, quò sunt extensiora; quia ad plures se diffundunt. Eiusmodi est ista opinio communis de ultione, quasi non modo licita sit, sed etiam honesta, contra Christi doctrinam, & Evangelij effata: nam si res foret honesta, non modo Christus eam non prohiberet, sed & commendaret, & juberet, quod contra factum videmus. Et in universum loquendo, ita videmus contingere, ut quæ communissima sunt, ea minus vera sint & probata: unde Apostolus vocat prudentiam carnis, mortem, & sapientiam huius Mundi dixit esse inimicam Deo. Ne igitur dicas communem hominum sensum, verum esse honorem, & contrariam hominum opinionem, verum esse dedecus, cum nec verus honor esse possit, neque verum dedecus, nisi sensus sit verus, & opinio vera; illa autem vera non sit, si non fuerit conformis iudicio Dei, quod est prima veritas. Etenim cùm iudicia humana per se non sint infallibilia: (aliо qui in illis nunquam esset error, quod dici

dici non potest, quoniam contradictionis simul vera esse possent, cum videamus quae apud alios probantur, apud alios improbari; nam apud Iaponios nemo inter Nobiles, vindictam injuriæ interpretatur actum fortitudinis, sed si alicui Rex imperarit ut seipsum interimat, ignaviæ adscribetur, si aliquis id facere detractarit, cum apud nos contraria judicentur:) hinc sequitur certitudinem judiciorum nostrorum aliunde petendam esse, Igitur à primâ judicandi regulâ quæ est prima veritas, quæ in rebus plurimis nobis nota non est, nisi per revelationem, quæ in Evangelio nobis facta est; in quo legimus laudatam injuriam per pessimum, & Christi doctrinæ, & eius exemplo; & contra ultionem semper damnatam, & prohibitam: unde justa est damnatio contrarij sensus: Itaque non jam dedecus est in se non vindicando, non jam verus honor in ultione: sed è contrario verus honor est in patientia injuriæ, & summum dedecus in ultione: Ac licet stulta Mundi sapientia id irrideat, & ignoratum vocet, quid id faciat, in glorium ac sine corde ac sensu, illud tamen usurpare mibi licet in hoc negotio, quod dixit Seneca epist 17. Mihi contingat iste derisus: æquo animo audienda sunt imperitorum convitia, & ad honesta vadenti contemnendus est iste contemptus: & quanto magis id nobis Christianis usurpandum est, post Christi doctrinam, & exempla tam illustria: sed nimis muti dicitur Ioan. 12. passim homines, dilexerunt gloriam, hominum magis, quam gloriam Dei.

Quartò: Sed si ita est, nobis à communione hominum cœtu excludendum est, cum contra communem hominum sensum vivendum sit: etenim aut nobis vivendum est uti alij solent, aut ab illis discedendum.

At primo: Quid moraris hujus communis sensus injustitiam, cum ei repugnant omnes Scripturæ, & Christi doctrina? Ne sinas itaque te vinci, & abstrahi communis errore, sed potius persuaderi te sinas à Christi doctrina: Nonne in omnibus rebus fidei ita te geris, ut non movearis vel sensu, vel consuetudine, vel iudicio humano, vel rationibus apparentibus, sed omnia dones autoritati divinæ, credendo etiam incredibilia? cur non idem facis in ijs quæ ad mores pertinent? Nam hæc non minus ad fidem pertinent, quam quæ proponuntur solum credenda intellectu: sed illis alijs præter fidem debetur actio, & praxis vitaque conformitas.

Secundò: Vnde fit ut in rebus plurimis ad vitam pertinentibus, non admodum curemus hominum iudicia, & sensus, in illis autem quæ ad mores, & virtutem pertinent, ea tantum timeamus; nisi quia virtutem erubescimus, & malis nostris affectionibus patricium querimus? Memineris dictum fuisse à Christo Matth. 11. *Et beatus qui non fuerit scandalizatus in me.* Certe nemo Christianus debet Christi Evangelium erubescere; illud autem continet omnem Christi doctrinam, cuius hæc pars est, Matth. 5. *Dilegit inimicos vestros, & benefacite his qui oderunt vos:* Et Lucæ 6.

Nn

Et

Et qui te percutit in maxillam , præbe & alteram : Scilicet ut potius paratus sis secundam injuriam ferre , quam primam ulcisci:

Tertio : Quis nesciat in omnibus ferè rebus diversa esse hominum judicia , itaque in rebus omnibus , nos semper habituros , & adversarios , & faventes ; & sic hoc unum sibi supe esse , ut recte elegat quibus magis consentire velit ? Quod si aliquibus haerendum est , cur non illis qui sapiunt , non autem illis qui non sapiunt? secundum illud ad Roman. 12. *Non alta sapientes , sed humilibus consentientes.* At Sapientes judicarunt , virtutis esse ignorare , atque fortitudinis opus ; è contrario autem infirmitatis se vindicare , quidquid contrarium vulgus infaniat , cuius judicium nemo prudens sequatur.

Quarto : Si aliter cum virtute vivere nemo potest quin recedat à communi hominum cœtu ; in primis quid moraris , mi Auditor , quin mundum deseris , & longè ab hominum perverorum consuetudine te abstrahis ? quin antra petis , ac deserta loca , & te in solitudinem abdis ? Vide quo pacto Loth Angeli compulerunt ut à Sodomis exiret : Tibi dictum puta , quod olim cœtibus inclamatum fuit Arsenio , Fuge Arseni , fuge sæculum , tibi prospice , curre in solitudinem : Ecce quod ait Sanctus Joannes 1. epist. cap. 3. *Mundus totus in maligno positus est : Quā multi in sæculi fugā salutem suam repérerunt ? Usque hodie Parthus tutus ab hoste fugā est.* Neque putas semper indecorum esse fugere : Christus ipse

solus fugit in montem , cum intellexit se à populis rapiendum , ut Rex fieret : & suis Discipulis fugam consuluit , Matth. 10. *Cum persequentur vos in civitate istâ , fugite in aliam :* Et certe , si ubi pestis græssatur , saluberrimum consilium est in fugâ , cur non idem tibi faciendum est , ut pessimas Mundi leges , & effata pestifera evites , ne te inficiant , & perimant .

Quod si sæculum ipso factò desere-re non est animus , id saltem facito moribus , sensu , & doctrinâ : Imitare Apostolos quos ait Christus Joan. 17. remansisse quidem in hoc mundo , sed non fuisse de mundo : *De mundo non sunt , sicut & ego non sum de mundo : Non rogo ut tollas eos de mundo , sed ut serves eos à malo:* Esto sicut Loth habitans in Sodomis de quo scribit Sanctus Petrus 2. Epistolâ cap. 2. *aspedu , & auditu iustus erat , habitans apud eos qui de die in diem animam justam iniquis operibus cruciabant : Noli itaque vivere , aut sentire cum mundanis hominibus , sed tuam vitam dirige , secundum Evangelicas leges , & secundum Christi exempla .*

Neque hoc satis , ut non sis de mundo , sed quia es in mundo & inter mundanos degis , non tantum alijs moribus vivas , sed etiam contrariis , certando cum mundo : & mundi principiis te opponendo , & factis , & doctrinâ : uti perpetua pugna fuit inter Jacob & Esau , & uti semper pugnavit Israël contra vicinas Nationes , donec eas penitus deleret : & ut dictum est Exodi 17. *Quia manus filij Domini , & bellum Domini erit contra Amalec à generatione*

ratione, in generationem. Quando veniet tempus, ut de adversariis victoriam reportes? Confidite ego vici mundum, non armis, sed patientia; non debellando, sed pariendo; non perdendo, sed miserando; non ultione, sed indulgentia, & condonatione; secundum illud Joannis 12. Et ego si exaltatus fuerō à terrā, omnia traham ad meipsum: hoc autem dicebat, significans, quā morte est moriturus. Sed quamvis ratio omnis decesset, credis ne te satis excusatum corām Deo, quo minus obedias præcepto quod statuit tibi, non ulciscendi injuriam quam accepisti, & contumeliæ quæ tibi facta est. Potuit tibi mandata indicere, & iis annexare vitæ jaēturam; quidni etiam honoris tui? Nonne eius Dominus est, æquè ac vitæ tuæ? Agitur, inquis, de honore tuo. Velim id quidem, quandoquidem ita vis, tametsi non verum istud est; at agitur etiam de suo; ut ipsi obediatur. Tuusne tanti est, quanti est suus? oportet ne tuum à te servari, sum perdi ab ipso? Est ne illum desperdere, pro causâ tam bonâ cum amittere? credisne posse te eum tueri contra ipsum voluntatem? nonne potest efficere mille viis ut eum perdas? 2. Reg. cap. 1. Quicunq; glorificaverit me, glorificabo eum, qui autem contemnunt me, erunt ignobiles; Atqui, et si amiseris, an non restituere

illum tibi potest? Vitam potest reddere, redditque cum usura & lucro iis, qui pro ipso eam amisere: cur non potest restituere honorem ijs, qui pro ipso illum neglexerint? Attende quam gloriā eos honoravit, qui pro ipsius amore, honorem mundi aspernati sunt. Quo in statu posuit eos qui se abdiderunt ipsius causâ, utque ei magis placerent. Verum si vitæ præsentis dedecus, usque adeò te afficit ac movet, quonam modo poteris sustinere alterius vitæ dedecus, quod æternum est. Idem homines quorum existimatio tibi nunc tam pretiosa est, opinionem mutabunt, atque ij, qui te laudaverint, te vituperaturi sunt: qui de te benè senserint, te contemnent: primum fuerit in tempore, alterum in æternitate futurum est. At quod pluris interrit, est honor aut dedecus, approbatio vel reprobatio, existimatio aut contemptus, quæ quidem expectare debes à Deo, cuius in solo judicio stabitur, cuius sola cognitio erit communis, cuius sola existimatio erit æterna, tuncque infelicitas vel beatitudo extrema & summa, tuaque ultima, & consummata miseria in inferis, aut felicitas in cœlo, quò nos perducat Pater, Filius & Spiritus sanctus.

Amen.